

- उपराष्ट्रपति जगदीप धनखड़ कह्यो-जनजातीय संस्कृति अर धरोहर ने राष्ट्रीय अर अंतर्राष्ट्रीय लेवल माथे मान मिलणो चाहिजे।
- उपमुख्यमंत्री दिया कुमारी राइजिंग राजस्थान समिट ऊं प्रदेश री तस्वीर बदलबा री उम्मीद जताई।
- राज्य री मंडियां ने ई-मंडी प्लेटफॉर्म रे मार्फत डिजिटल बणायी जावेला।
- प्रदेश मांय घणखर ठौड़ां पारो सामान्य ऊं ऊंचो।

000

उपराष्ट्रपति जगदीप धनखड़ कह्यो है के जनजातीय संस्कृति अर धरोहर ने राष्ट्रीय अर अंतरराष्ट्रीय स्तर माथे मान मिलणो चाहिजे। वे आज उदयपुर मांय भगवान बिरसा मुंडा री 150वीं जयंती रा सिलसिला मांय राखी ज्या कार्यक्रम मांय बोल रह्या हा। श्री धनखड़ कह्यो के लोभ दे र जनजाति तबका री जनता री आस्था मांय बदलाव री कोशिश करी जा रही है। वे कह्यो के सांस्कृतिक धरोहर म्हाणी नींव है। भगवान बिरसा मुंडा रा योगदान रो जिकर करता थकां वे कह्यो के भगवान बिरसा मुंडा देश री आज़ादी सारु, जनजाति सारु, मिट्टी सारु जो काम कीनो, वां री कल्पना नी करी जा सके है। उपराष्ट्रपति कह्यो के पर्यावरण, देशी जीवन, परिवार अर इंसान रा कर्तव्य रा बारा मांय आदिवासियां ऊं सीख लेवणी चाहिजे। वे कह्यो के 'जल, जंगल, जमीन' केवल शब्द नी है, बल्कि जीवन शैली है। उपराष्ट्रपति कह्यो के भगवान बिरसा मुंडा री सीख स्थायी जीवन अर पर्यावरण रा मान रो महत्व बतावे है।

-----

उपराष्ट्रपति कह्यो के श्रीमती द्रौपदी मुर्मू रो राष्ट्रपति बणबो जनजातीय गौरव री निशाणी है। वे इण ने भारत रा लोकतंत्र री समावेशिता अर विविधता रो प्रतीक बतायो। उपराष्ट्रपति नौजवानां ऊं भणार्ई-लिखाई माथे ध्यान देवण बाबत् कह्यो। वे कह्यो के देश तेजी ऊं तरक्की कर रह्यो है अर आवण वाळी पीढ़ियां देश ने नुवी ऊंचाईयां माथे ले जावेला।

000

प्रधानमंत्री नरेन्द्र मोदी ज़ोर दे र कह्यो है के वां री सरकार वोट बैंक री सियासत ऊं हट र भारत ने विकसित देश बणावण माथे ध्यान दे रही है। एक गैर-सरकारी मीडिया संगठन कानी ऊं राखी ज्यी लीडरशिप समिट मांय प्रधानमंत्री कह्यो के वां री सरकार जनता सारु, जनता कानी ऊं प्रगति रा मंत्र सागे काम कर रही है। वे कह्यो के सरकार विकास रो ऐंडो मॉडल अपना रही है, जठे निवेश ऊं प्रगति अर रोजगार ने गति मिले।

-----

प्रधानमंत्री कह्यो के देश मांय अब सवा लाख ऊं बत्ता पंजीकृत स्टार्टअप है अर नौजवान देश रो माथो ऊंचो करण री मर्जी राखे है। प्रधानमंत्री कह्यो के आज देश मांय कम ऊं कम 10 करोड़ लखपति दीदियां है।

000

उपमुख्यमंत्री दिया कुमारी कह्यो है के राइजिंग राजस्थान समिट ऊं प्रदेश री तस्वीर बदलेला। दिया कुमारी एक दिन रा दौरा रा तैत आज भीलवाड़ा ज़िला मांय सहाड़ा विधानसभा हलका मांय खबरनवीसां सागे बातचीत कर रही ही। वे कह्यो के देश रा मोटा-मोटा कारोबारी अठे निवेश करण बाबत् करार कर रह्या है अर सरकार प्रदेश ने समृद्ध राज्य बणावण री पूरी कोशिश कर रही है।

000

उपमुख्यमंत्री दिया कुमारी आज ब्यावर जिला रा मसूदा कने देवमाली गाँव रो दौरा कीनो। उपमुख्यमंत्री कह्यो के देवमाली गाँव मांय सैलाणियां सारु बुनियादी सुबीता विकसित कर्या जावेला। केन्द्र सरकार लारला दिनां देवमाली रे सैलाणियां सारु बेहतरीन गांव व्हेवण रो ऐलाण कीनो हो। देवमाली गाँव रा पाँच सौ ऊं बत्ता घरां मांय ऊं किण री ई पक्की छत नी है। वठे घरां मांय ताळा नी लगाया जावे है अर गाँव मांय कोई अपराध नी व्हे है।

000

उद्योग अर वाणिज्य विभाग पीएम विश्वकर्मा योजना रा तैत बैंकां ऊं कर्ज लेवण वाळां कानी ऊं चुकायी ज्या ब्याज माथे 2 फीसदी और सब्सिडी देवण ऊं जुड़्यो हुकम जारी कीनो है। ई पाछे अब पात्र लोगां ने पीएम विश्वकर्मा योजना रा तैत महज 3 फीसदी ब्याज री रेट ऊं कर्ज मिल सकेला। उद्योग मंत्री राज्यवर्धन सिंह राठौड़ आ जाणकारी दीनी। वे बतायो के ई योजना रा तैत केन्द्र सरकार खाती, लुहार, मूर्तिकार, सुनार अर कुम्हार समेत 18 भांत रा दस्तकारां ने फायदो दे रही है। उद्योग मंत्री कह्यो के ई योजना रा तैत दस्तकारां

ने पीएम विश्वकर्मा सर्टिफिकेट अर हुनर ने और बेहतर बणावण सारू सिखावण, 15 हजार रूपया री टूलकिट मदद अर बैंक कानी ऊं सस्ती रेट ऊं बिना गारंटी कर्ज मुहैया करायो जावे है।

000

प्रदेश री कृषि उपज मण्डियां ने ई-मण्डी प्लेटफॉर्म रे मार्फत डिजिटल बनायी जावेला। कृषि अर उद्यानिकी विभाग रा शान सचिव राजन विशाल बतायो के मण्डी समिति री पूरी प्रक्रिया ने ई-मण्डी प्लेटफॉर्म रे मार्फत करी जावण पाछे ई-ऑक्शन अर ई-भुगतान करया जा सकेला। वे बतायो के ई-ऑक्शन रे मार्फत कारोबारियां ने किण ई ठौड़ा ऊं भाव लगावण रो मौको मिलेला।

000

प्रदेश मांय घणखर ठौड़ां पारो औसत ऊं बत्तो व्हेवण रे कारण फिलहाल ठण्ड रो घणो असर महसूस नी व्हे रह्यो है, हालांकि आज राज्य मांय 14 ठौड़ां न्यूनतम तापमान 15 डिग्री सेल्सियस या इण ऊं कम दर्ज करी ज्यो। ओ तापमान आं दिनां रेहवण वाळा सामान्य तापमान ऊं बत्तो है। लारला 24 घंटा मांय सब ऊं कम 12 डिग्री सेल्सियस तापमान सिरौही मांय दर्ज करी ज्यो। राजधानी जयपुर मांय रात री बगत पारो उतर र 17 दशमलव 8 डिग्री सेल्सियस दर्ज करी ज्यो, हालांकि ओ ई सामान्य ऊं करीब 3 डिग्री सेल्सियस ऊंचो है। मौसम केन्द्र जयपुर रा निदेशक राधेश्याम शर्मा आकाशवाणी ने बतायो के 2-3 दिन पाछे ठंड रो असर बढबा अर प्रदेश रा उत्तराद हलकां मांय घणो कोहरो रेहवण रा आसार है।

000

भरतपुर जिला रा केवलादेव राष्ट्रीय उद्यान मांय प्रवासी परिंदा आवण लाग्या है। आं रा झुंड मांय दो हजार ऊं बत्ता परिन्दा है। म्हाणा खबरनवीस बतायो के एके सागे मोटी तादाद मांय परिन्दा आवण ऊं सैलानी घणा राजी है।

000

जोधपुर मांय केन्द्रीय रिजर्व पुलिस बल रा नवारक्षी प्रशिक्षण केन्द्र मांय आज 478 नुवा आरक्षियां रो 44 सप्ताह रो सघन बुनियादी प्रशिक्षण शिविर पूरो व्ह्यो। ई मौके राख्यी ज्यी दीक्षांत परेड री केन्द्रीय रिजर्व पुलिस बल री राजस्थान सेक्टर री महानिरीक्षक डॉ. अर्चना शिवहरे सलामी लीनी। ई मौके वे कह्यो के बुनियादी सिखावण रो मकसद नुवा भर्ती व्ह्या रंगरूटां री जिन्दगी मांय अनुशासन लावणो अर वां ने शारीरिक अर मानसिक तौर ऊं मजबूत बणावणो है। केन्द्र रा प्राचार्य पुलिस उप महानिरीक्षक अशोक स्वामी बतायो के 16 अक्टूबर, 2023 ने सरू व्ही सिखावण रा तैत आं रंगरूटां ने शारीरिक प्रशिक्षण, ड्रिल, हथियार चलावण अर नक्शा समझण समेत न्यारी-न्यारी सिखावण दीरीजी।

000

जोधपुर अर पाली संभाग रा बुजुर्गा ने ले र तीर्थ यात्रा खास रेलगाडी आज जोधपुर ऊं रवाना व्हेला। आ गाडी रामेश्वरम, मदुरई अर दूजी धार्मिक ठौड़ां री यात्रा करावेला। ई गाडी मांय जोधपुर जिला रा 400, पाली जिला रा 200 अर सिरौही जिला रा 180 बुजुर्ग तीर्थ सारू जावेला। आ यात्रा 23 नवम्बर ने पूरी व्हेला। आज जोधपुर रेलवे स्टेशन माथे देवस्थान विभाग री ओर ऊं आ सगळा मुसाफिरां सारू भोजन-पाणी री व्यवस्था करी ज्यी।

000

झालावाड़ मांय भर रह्या चन्द्रभागा कार्तिक मेळा मांय आज न्यारी-न्यारी होड़ां राख्यी ज्यी। मेला मैदान मांय संवारे 10 बज्यां ऊं अन्तर्राष्ट्रीय स्तर रा पतंगबाज़ पतंगां उड़ाई अर दिव्यांग बच्चां सारू पतंग माथे पेंटिंग बणावण री होड़ राख्यी ज्यी।

000